

# Coordinar l'adiever da las medias modernas en scola

Ina incumbensa parlamentara da la cumissiun per furmaziun e culturala

DA MARTIN CAB ALZAR

■ **La cumissiun per furmaziun e cultura dal cussegl grond vul incumbensar la regenza d'elavurar in concept per l'instrucziun d'informatica e communicaziun. Cuntrari ad auters chantuns da la Svzra orientala n'haja il Grischun fin oz nagin concept per l'instrucziun correspondenten en scola populara.** La cumissiun da furmaziun e cultura accentuescha en sia argumentaziun che il diever da medias modernas sa chapeschia oz da sez en mintga sector da la vita. In na dettia numadamain strusch pli plazzas da lavur che na premettan betg enconuschientschas da la tecnologia d'infurmaziun e da communicaziun. Cuntrari ad auters chantuns na descrivia il chantun Grischun betg co las medias modernas duan vegnir applitgadas en l'instrucziun. Tenor la lescha da scola vertenta «s'acquistan e sviluppan tut ils scolars enconuschientschas e cumpetenzas fundamentalas che permettan ad els d'emprender durant lur entira vita e da chattar lur piazza en la societad ed en la vita professiunala».

## Nagin proceder coordinà

Sco quai che la cumissiun accentuescha han – per mancanza da prescripziuns chantunals – diversas instituziuns responsablas per la scola sviluppa agens concepts cun agid d'interpresas da cussegliaziun privatas. Ellas applitgeschian uschia las medias modernas tenor agen parairi. Quai haja dentant per consequenza che las enconuschientschas dals scolars èn fitg differentas entaifer il chantun. Per las instituziuns da scola responsablas sa resultian plinavant gronds custs che pudessan vegnir spargnads tras in proceder coordinà.

Gist en vista a la mancanza da persunal spezialisà en las professiuns tecnicas fan la confederaziun e numerus chantuns gronds sforzs per rinforzar ils roms da matematica,



L'instrucziun d'informatica e medias duai vegnir coordinada meglier en l'avegnir.

MAD

informatica, ciencias naturalas e tecnica. La cumissiun è da l'avis che quest rinforz duess cumenzar er tar nus gia en la scola populara, sco previs en il Plan d'instrucziun 21. Per tegnair quint da la gronda impurtanza da la furmaziun d'informatica e da communicaziun e per mantegnair l'egualitad da schanzas dals scolars grischuns en cumparegliaziun cun scolars d'auters chantuns incumbenscha la cumissiun da furmaziun e cultura la regenza d'elavurar in concept integral d'informatica e communicaziun per la scola populara, resguardond las prescripziuns dal Plan d'instrucziun 21. Quest concept duai tenor la cumissiun

cumpigliar ils suandants secturs: cuntigns, cussegliaziun, cooperaziun e plan d'implimentaziun. Il concept duai plinavant vegnir elavurà en cooperaziun cun la Scola auta da pedagogia, cun l'Associaziun dals cussegls da scola, cun la Federaziun da mainascolas e cun la Magistraglia Grischun.

## Instrucziun d'informatica en il Plan d'instrucziun 21

En sia resposta consenta la regenza che las tecnologias d'infurmaziun e communicaziun daventian adina pli impurtantas per nossa societad. Per che las scholaras ed ils scolars possian dumagnar cun success questas

novas sfidas saja vegnì sviluppa per il Plan d'instrucziun 21 in plan per ils moduls «medias ed informatica». Ils cuntigns vegnian intermediads d'ina varat en structuras da temp specialmain cumprovadas durant l'instrucziun cursorica e da l'autra vart en secturs spezial, principalmain en ils roms «tudestg», «furmar» e «natira, uman, societad». I sa tracta qua principalmain d'acquistar cumpetenzas d'applicaziun.

Ensem cun auters plans d'instrucziun e moduls vegnia era la sparta «Medias ed informatica» examinada ils proxims mais en il rom da l'introducziun futura dal PI 21. Sche necessari duai quest plan ve-

gnir adattà als basegns chantunals. En il medem temp vegnia il departament responsabel a far in rapport per mauns da la regenza e quai sunter ch'il PI 21 è vegnì deliberà la fin d'october dals chantuns. En quest rapport duain vegnir preschentas las novaziuns las pli impurtantas en connex cun il PI 21 per il chantun sco quai che la regenza ha sincerà en sia resposta a l'incumbensa da deputada *Elita Florin-Caluori*. Quest rapport vegnia a mussar tge basegn da furmaziun supplementara ch'è avant maun tar las persunas d'instrucziun ed en spezial era a tematisar las qualificaziuns posteriuras necessarias per il nov sector spezial «medias ed informatica». Il rapport, las novas tavlas d'instrucziun e las parts dal plan d'instrucziun che vegnan eventualmain adattadas per il Grischun vegnian la finala ad esser componentas decisivas dal conclus da la regenza.

## Agid e sustegn per las instituziuns da scola

En connex cun l'introducziun dal PI 21 vegnia la regenza er a laschar elvurar agids per las instituziuns responsablas per la scola. Quels duain cuntegnair standards minimals concernent l'equipament da basa tecnic da las scolas per l'introducziun dad informatica, inclusiv infurmaziun davart ils custs che resultan previsiblmain en chausa. Las instituziuns menziunadas en l'incumbensa parlamentara vegnian involvidas a moda adequata en quest proceder, sincerescha la regenza. Per motivs persunals, finanziaus e da precedenza duai dentant vegnir renunzià da crear per quest intent in post da cussegliaziun special. En cass da basegn possia dentant vegnir tratg en consideraziun d'engaschar en la fasa da realisaziun ina gruppa accompagnanta, sco quai saja per exempel vegnì pratigà cun success en l'instrucziun da linguas estras e tar l'introducziun da novs meds d'instrucziun.